

Missingiut

Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsisip allanngortinneqarnissaanut

siunnersuut

(Immami ingerlatanit mingutsitsinerup pitsaaliornissaanut killilernissaanullu, matumani Issittup imartaani Kalaallit Nunaata eqqaani imartani aningaasaqarnikkut immikkut oqartussaaffigisani uuliap oqimaatsup umiarsuit ikummatissaattut atorineqarnissaa siunertaralugu atorineqarnissaanut assartornissaanullu inerteqqut pillugu maleruagassanik aalajangersaanissamut piginnaatitsissut)

§ 1

Inatsimmi nr. 1534, 19. december 2017-imeersumi Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsimmi tulliusut allanngortinneqarput:

1. Kapitel 10-mi § 22-p kingorna ilanngunneqassaaq:

»§ 22 a. Miljøministeri immami ingerlatanit mingutsitsinerup pitsaaliornissaanut killilernissaanullu maleruagassanik, kapitali 2-9 imaluunniit §§ 21 imaluunniit 22-mi maleruagassanut ilaangitsunik, aalajangersaassaaq, matumani nunat tamalaat akornanni isumaqatigiissutit eqqortinniarlugit.«

2. § 46, imm. 1-imi »§§ 22,«-p kingorna ilanngunneqassaaq: »22 a,«.

§ 2

Inatsit atuutilersinneqassaaq ulloq 1. juli 2024.

1. Aallarniut

Inatsimmut siunnersuummi uani siunnersutigineqarpoq, Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsimmut immami ingerlatanit mingutsitsinerup pitsaaliornissaanut killilernissaanullu maleruagassanik, inatsimmi kapitali 2-9 imaluunniit §§ 21 imaluunniit 22-mi ilaanngitsunik, miljøministerimut aalajangersaasinnaanermut piginnaatitsissut ilanngunneqassasoq.

Aalajangersagaq uuliap oqimaatsup (kingorna taaneqartassaaq HFO, ”heavy fuel oil”) Issittup imartaani Kalaallit Nunaata eqqaani imartani aningaasaqarnikkut immikkut oqartussaaffigisani umiarsuit ikummatissaattut atorineqarnissaa siunertaralugu atorineqarnissaanut assartornissaanullu inerteqqut pillugu ilaatigut pisariaqartinneqarpoq.

Inerteqqut Marine Environment Protection Committee (MECP)-imit Naalagaaffiit Peqatigiit imarsiorneq pillugu suleqatigiiffiata ataaniittumit 2021-mi akuersissutigineqarpoq aamma umiarsuarnit mingutsitsinerup pitsaaliornissaanut nunat tamat akornanni isumaqatigiissummut 1973/78-imeersumut (kingorna MARPOL-imik taaneqartassaaq) Danmarkimillu akuerineqarsimasumut, ilanngussaq 1-imut ilanngunneqarsimavoq. HFO-mik inerteqqut aallaavittut naalagaaffinni isumaqatigiissuteqartuni akuersissutigineqarsimassaaq kingusinnerpaamik ulloq 1. juli 2024, taamaattorli umiarsuit ilaannut ulloq 1. juli 2029-mi. Inerteqqut umiarsuarnut umiarsuit isumannaatsuunissaat pillugu qulakkeerinninnermik suliaqarlutik peqataasunut imaluunniit ujaasinernik aamma annaassiniarnernik suliaqartunut, aamma umiarsuarnut uuliakoortoqarsimatillugu upalungaarsimanermut suleqataasunut atuutinngilaq.

Inerteqqut siullerpaamik Issittup imartaani HFO-mik mingutsitsisoqannginnissaanik pitsaaliuissaaq, taanna imaani avatangiisini sineriammut qanittumi pinngortitami ataqatigiinnut aarlerinaateqarmat. Tamanna ingammik Issittumut atuuppoq, imaani avatangiisit aamma sineriammut qanittumi pinngortitami ataqatigiit immikkut ittumik mianernarmata. Aammattaaq HFO-mik inerteqqut silaannarmik mingutsitsinerumut pitsaaliuissaaq aamma silap pissusiata allanngoriartorneranik pitsaaliuissalluni, tassami HFO-mik atuineq, ikummatissanut oqinnerusunut sanilliullugu, sananeqaatinik minnernik

amerlanerujussuarnik aniatsitsisarmat, black carbon (sod), CO₂ aamma svovl.

Naatsorsuutigineqarpoq miljøministerip HFO-mik inerteqquteqarneq pillugu piginnaatitsissut nalunaarummi ulloq 1. juli 2024-mi atuutilersinneqartussami maleruagassanik aalajangersaanikkut piviusunngortissagaa, taannalu qallunaat kalaallillu umiarsuaaannut atuutissaaq, kiisalu umiarsuarnut nunanit allaneersunut, Kalaallit Nunaata eqqaani imartani aningaasaqarnikkut immikkut oqartussaaffigisamiittunut, tamatumani nunat tamalaat akornanni inatsisaasunut naleqqiullugu qanoq naapertuutsiginera apeqqutaatillugu, atuutissalluni. Aammattaaq imaani avatangiisit illersorneqarnissaat pillugu inatsimmi § 33, imm. 1 aalajangersagaq atuuttoq malillugu Issittup imartaani tamani qallunaat umiarsuaannut, HFO-mik inerteqqut pillugu maleruagassanik aalajangersaasoqarnissaa naatsorsuutigineqarpoq, tak. Inatsisitut nalunaarut nr. 1165, 25. november 2019-imeersoq (matuma kingorna Danmarkip imaani avatangiisit pillugit inatsisaannik taaneqartassaaq). Kalaallit Nunaata imartaani avatangiisini HFO-mik inerteqqummut maleruagassat Kalaallit Nunaata aalajangersartarpai.

Aammattaaq aalajangersaanissamut piginnaatitsissut siunnersuutigineqartoq ilaatigut siunissami Kalaallit Nunaata eqqaani imartani aningaasaqarnikkut immikkut oqartussaaffigisani immami ingerlatanit, inatsimmi kapitalini 2-9-mi imaluunniit §§-ini 21-mi imaluunniit 22-mi aalajangersarneqarsimangitsunik, mingutsitsinerup pitsaaliornissaanut killilernissaanullu qulakkeerisussanik nunat tamalaat akornanni isumaqatigiissutit piviusunngortittarnissaannut periarfissiisassaaq. Taamaalilluni nunat tamalaat akornanni immat pillugit isumaqatigiissutini aamma Naalagaaffiit Peqatigiit imarsiornermut suleqatigiiffiata iluani nunat tamalaat akornanni mingutsitsinerup pitsaaliornissaanut killilernissaanullu isumaqatigiissutit pitsanngorsarniarlugit aaqqissuuteqarfiginiarlugillu ingerlaavartumik sulisoqarpoq. Aalajangersaanissamut piginnaatitsissutit siunnersuutigineqartoq danskit imaani avatangiisit pillugit inatsisaanni § 33, imm. 1-imi aalajangersakkamut atuuttumut imamigut assinguvoq.

Issittumi Kalaallit Nunaata eqqaani imartani aningaasaqarnikkut immikkut oqartussaaffigisami HFO-mik inerteqqut pillugu aalajangersaasinnaanermut piginnaatitsinissaq pillugu siunnersuutip atuutinneqalertussatut naatsorsuutigineqartup piviusunngortinnissaanut Kalaallit Nunaanni inuussutissarsiornermut aningaasaqarnikkut aamma allaffissornikkut aqutsinermut ukiumut miss. 22,7 mio. kr.-ninik (ukiumut 2020-mut naatsorsukkat) aningaasartuutinik kinguneqassasoq naatsorsuutigineqarpoq. Taamaattorli aningaasat taakku annertussusaannut ikummatissap akia apeqqutaassaaq taamaattumillu nalorninarloqarluni.

Aammattaq Kalaallit Nunaanni Namminersorlutik Oqartussanut ukiumut 8,4 mio. kr.-nik aningaasartuutitaqassaaq, avatangiisinut aamma peqqissusermut iluanaarutitaqassalluni ukiumut 62,1 mio. kr.-nik, silap pissusianut iluanaarutitaqassalluni ukiumut 0,33 mio. kr.-nik iluanaarutitaqassalluni, kiisalu uuliamik kuuttoornernut annikinnerusunik aningaasartuutitaqassalluni. Erseqqissaatigineqassaaq, aningaasaqarnikkut kingunerisassatut aamma peqqissusermut silallu pissusianut iluanaarutissatut missiliuutigineqartut inerteqqutip 2020-mi atuutilersinneqarnissaanik tunngaveqarsimmata. 2029-mut inuiaqatigiinnut kingunerisussat aamma iluanaarutissat siumut ullulerneqarsinnaasimangillat, ukiumi tassani inerteqqut umiarsuarnut tamanut atuutilertussaavoq, taamaattorli sorsuutitut umiarsuarnullu allanut naalagaaffimmit pigineqartunut atorineqartunulluunniit, umiarsuarnut taamaallaat iluanaarniutaanngitsumik naalagaaffimmit atorineqarallartunut atuutissanngilaq, tak. inatsimmi § 3, imm. 4, umiarsuarnut umiarsuit isumannaatsuunissaanik qulakkeerinninnermut suliaqarnermut peqataasunut imaluunniit ujaasinernik aamma annaassiniarnernik suliaqartunut, aamma umiarsuarnut uuliakoortoqarsimatillugu upalungaarsimanermut suleqataasunut inerteqqut atuutissaaq.

2. Immami ingerlatanit mingutsitsinerup pitsaaliornissaanut killilernissaanullu maleruagassanik aalajangersaanissamut piginnaatitsissut

2.1. Inatsit atuuttoq

Namminersorlutik Oqartussat imartami imaani avatangiisit illersorneqarnissaat pillugu suliaqarfik tigusimavaat, taanna imartat iluanni imartallu avataanni sinerissamit killeqarfeqartoq tunngaviumik titarnerit killiliussaniit qaqugukkulluunniit atuuttunit 3 sòmilit tikillugit avasitsigisumiittoq. Danmarkip Kalaallit Nunaata eqqaani imartani aningaasaqarnikkut immikkut oqartussaaffigisaq, Kalaallit Nunaata imartaanit imartat avataannik iluannilu sinerissamit killeqarfeqartoq tunngaviumik titarnerit killiliussaniit qaqugukkulluunniit atuuttunit 200 sòmilit tikillugit avasitsigisumiittoq suli piginnaatitaaffigaa, tak. Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsimmi § 5. Imaq pillugu inatsisunik atuutitsineq pillugu isumaqatigiisummi art. 57 naapertorlugu aningaasaqarnikkut immikkut oqartussaaffigisaq titarnernit killiliussaniit uuttortarneqartarpoq, kisianni taamaallaat imartap avataani imartaq kisimi pineqarluni, tassa imaappoq dvs. 3 sòmilit tunngaviumik titarnerit

killiliussaniit 3 sòmilit tikillugit avasitsigisumiittumit aamma titarnerit killiliussaniit 200 sòmilit tikillugit avasitsigisumiittumut.

Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsit qallunaat kalaallillu umiarsuaannut silaannakkullu angallassissutaannut, Kalaallit Nunaata eqqaani imartani aningaasaqarnikkut immikkut oqartussaaffigisanniittunut atuuppoq, aamma umiarsuarnut nunanit allaneersunut Kalaallit Nunaata eqqaani imartani aningaasaqarnikkut oqartussaaffigisaaniittunut taassumaluunniit avataaniittunut atuulluni, tamanna nunat tamalaat akornanni inatsisaasunut naapertuuppat, tak. inatsimmi § 3, imm. 1. Umiarsuarnut silaannakkullu angallassisutinut maleruagassat aningaasaqarnikkut immikkut oqartussaaffigisami sikumi ingerlatanut aamma taamatut atuupput, ingerlatat inatsisip allap ataani aalajangersaaffigineqarsimangippata, tak. § 3, imm. 2. Kalaallit Nunaanni aatsitassanut ikummatissanullu inatsisip ataani ingerlatanut atatillugu imartanik illersuineq inatsimmut ilaangilaq, tak. inatsimmi § 3, imm. 3. Aammattaaq inatsit sorsuutinut umiarsuarnullu allanut naalagaaffimmit pigineqartunut atorneqartunulluunniit, umiarsuarnut taamaallaat iluanaarniutaanngitsumik naalagaaffimmit atorneqarallartunut atuutinnilaq, tak. § 3, imm. 4.

Inatsisip kapitalii 2-9 ilaatigut uuliamik imaarsineq, pitsaassutsinut immikkoortiterisarnissaq, akuutissat suikkaasut imerpalasullu bulkimut assartorneqarnissaat imaarneqarnissaallu, erngup tankinut errortuutaasup usingiarneqartarnera aamma imaarutiginera, akuutissanik atortussanillu poortugaasunik assartuineq, containerinik il. il. assartuineq, imermik oqimaaloqutaasumik aamma imikumik kuuffitsigut kuutsitsineq aamma eqqagassanik eqqaaneq, aamma immap naqqanit qaqinneqartunik eqqaaneq imaluunniit aalisakkanik pisanillu eqqaaneq pillugit maleruagassanik aalajangersaanissamut piginnaatitsissutinik ilaatigut imaqarpoq. Tamatuma saniatigut inatsisitigut, passussinissamut maleruagassat aalajangersarneqarsimapput, matumani imermik oqimaaloqutaasup kinnganikullu passunnissaanut atugassap sanaartukkap sananeqaataanik akuerinninneq, aamma akuutissanik atortussanillu allanik eqqaanissamut inerteqqut pillugu maleruagassat ilanngulluigt, atortussanik immap naqqanit qaqinneqartunik imaluunniit aalisakkanik pisanillu eqqaaneq pinnagit. Kapitali 10-mi § 21-mi akuutissanik atortussanillu ikuallaanermut, matumani inerteqqummut maleruagassanik aalajangersagaqarpoq. § 22-mi aalajangersakkap miljøministeri immikkut pineqaatissiissutit pillugit maleruagassanik, matumani umiarsuarni ikummatissanik umiarsuarniittoqarnissaanut piunasaqaat pillugu aalajangersaanissamut piginnaatippaa, silaannarmik mingutsitsinerup killilerneqarnissaa

siunertaralugu. § 22-mut inatsimmut oqaaseqaatit malillugit, tak. Folketingstidende 2017-18, tillæg A, L 53-mi saqqummiunneqartutut, qupp. 42, aalajangersakkap silaannarmik mingutsitsineq killilersussavaa, aamma taanna MARPOL-imut isumaqatigiisummi ilanngussartaani: VI silaannarmik mingutsitsinermik pitsaaliuineq-mik, tunuliaqutaqarpoq aamma tamatumunnga naapertuutsillugu atuarneqassalluni. Ilanngussaq VI nakkutilliineq aamma akuersissutinik tunniussineq pillugit maleruagassanik, umiarsuit anitsitsinerannik nakkutilliineq (matumani akuutissat ilaannik ikuallaanissamut inerteqqut) aamma nunat tamalaat umiarsuaasa angallanneranni CO₂-mik aniatsitsineq pillugu piumasaqaatit pillugit ilaatigut imaqarpoq. § 22-mi piginnaatitsissut atorneqanngilaq.

Kapitalini 2-10-ni imaluunniit § 21-mi aalajangersaaffigineqarsimanngitsut pillugit inatsit atuuttoq malillugu imaani avatangiisini uuliamik koortoornermut imaluunniit immami ingerlatanit allanit mingutsitsinermik pitsaaliuinissamut killilernissaanullu inatsisikkut tunngavissaqanngilaq.

Nakkutilliinissamut pisussaaffik inatsimmi § 31-mi aalajangersarneqarsimavoq, tamatumalu kinguneratut miljøministeri aamma forsvarsministeri inatsimmi, inatsillu malillugu maleruagassanik aalajangersarneqarsimasunik nakkutilliisussaapput. Forsvarsministerip imaani avatangiisinik nakkutilliinermik, matumani ilaatigut imarsiornermi imaani avatangiisinik nakkutilliinermik, imaani uuliamik akuutissanillu mingutsitsinermik akiuineq, nalunaarutinik tiguisarneq, umiarsuarmut suaarluni attaveqarneq kiisalu inassuteqarneq inerteqquteqarnerluunniit akisussaaffigai. Miljøministerip nakkutilliinera allaffissornikkut aqutsineruneruvoq, miljøministeri Kalaallit Nunaaniinngimmat. Miljøministeri inatsisinut tunngasunut akisussaasuvoq.

Miljøministeri § 34, imm. 1 malillugu, ministerieqarfiup ataani naalagaaffimmi oqartussaasut suliarinnittussanngorlugit piginnaatissinnaavai imaluunniit naalagaaffimmi oqartussani allani ministeri attuumassuteqartoq isumaqatiginninniuteqarfigereerlugu, inatsit taanna malillugu miljøministerimut suliassanngortinneqarsimasunik suliarinnittussanngortitsisinnaavoq. Taamaalilluni miljøministerip nakkutilliinissamut imermik oqimaaloqutaasut pillugit maleruagassanik nakkutilliinissamut pisussaaffia, inatsimmi § 16, imm. 2 aamma 3, aamma § 17, imm. 4 malillugit aalajangersarneqarsimasut Miljøstyrelsenimut suliassanngortinneqarsimapput, tak. inatsimmi § 34, imm. 1.

2.2. MARPOL-imik isumaqatigiisut aamma HFO-mik inerteqqut ilanngussaq I regel 43A-mi

MARPOL-imik isumaqatigiissut, umiarsuarnit mingutsitsinerup pitsaaliornissaanik siunertaqtoq, ulloq 2. november 1973-imi Naalagaaffiit Peqatigiit imarsiorneq pillugu suleqatigiiffianit atsiorneqarpoq. Protokoli 1978-imeersoq kingorna akuersissutigineqarpoq taakkulu marluullutik 2. oktober 1983-imi atuutilerput. Tamatuma kingorna isumaqatigiissut 1997-imi protokolikkut allanngortinneqarpoq aamma ukiut ingerlanerini arlalinnik tapiliussanik allannguinnikkut allanngortinneqarluni.

Imaani avatangiisinik illersuineranut ataatsimiititaliap, MEPC-ip, Naalagaaffiit Peqatigiit imarsiornermut kattuffissuannit piginnaatinneqarluni suliassat avatangiisinut tunngasut suliarisarpai, matumani umiarsuit mingutsitsinerannik, MARPOL-imi aalajangersaavigineqarsimasumik nakkutilliineq pitsaaliuinerlu. MEPC-ip 2021-mi isumaqatigiissummi 76/15/Add.2-mi Issittup imartaani uuliap oqimaatsup umiarsuit ikummatissaattut atorneqarnissaa siunertaralugu atorneqarnissaanut assartornissaanullu inerteqqut akuersissutigaa.

Isumaqatigiissut MARPOL-imik isumaqatigiissummi ilanngussaq I-imut ilanngunneqarsimavoq Issittup imartaani atuinissamut angallannissamullu immikkut ittumik piumasaqaatinut maleruagassatut 43A-tut. Isumaqatigiissummut ilanngussaq I-imi maleruagassat imaani uuliamik mingutsitsineq pitsaaliussavaat. Inerteqqut kapitali 9-mut ilanngunneqarsimavoq, Issittup imartaani uuliamik atuinermut angallassinermullu immikkut ittumik piumasaqaatinik aalajangersaasoq. Issittup imartai ilanngussap maleruagassaani 46.2-mi nassuiarneqarput.

HFO—mut inerteqquttip siullermik Issittumi HFO-mi uuliamik kuuttoornissamik pitsaaliuinissaq siunertaraa, tamanna imaani avatangiisinut aamma sinerissamut qanittumi pinngortitami ataqatigiinnernut aarlerinaateqarpoq, tassami ikummatissaq oqimaatsoq kinertuuvoq aamma ikummatissanit oqinnerusunit arriinnerusumik arrotinneqartarluni. HFO-mik inerteqqut aammattaaq silaannarmik mingutsitsinermik aamma silap pissusiata sunniutaanik pitsaaliueqataassaaq, tassami HFO-mik atuneq, ikummatissanut oqinnerusunut naleqqiullugu, sananeqaatinik minnernik amerlanerujussuarnik aniatsitsisarmat, matumani black carbon, aamma annertunerusumik CO₂ -mik svovlimillu aniatitsisararluni.

HFO pingaarnerusumik issittumi arriitsumik arrotinneqartarpoq aamma uulia oqimaatsoq taamatutaaq sikup ataaniilersinnaavoq annertuumillu isorartussusilinnut siaruaassinnaasararluni, taamaattumillu Issittumi imaani avatangiisit aamma Issittumi sinerissamut qanittumi pinngortitami ataqatigiinnerit immikkut ittumik mianernartuupput. Issittumi sikup aannerata kinguneratut annerujartuinnartumik umiarsuarmik angallannerit, aamma aatsitassanut ikummatissanullu attuumassuteqartunik suliniutit nutaat takornarialerinerullu kingunerattut siunissami uuliamik

oqimaatumik kuuttoornissamat aarlerinaatit annertunerulernissaat naatorsuutigineqarpoq.

Inerteqqutip nassataatut uuliat MARPOL-imi ilanngussaq I-mi, maleruagassami 43.1.2-imi ilanngunneqarsimasut, Issittup imartaani ulloq 1. juli 2024-mit umiarsuit ikummatissaattut atorneqarsinnaajunnaassapput imaluunniit umiarsuit ikummatissaattut atorneqarnissaa siunertaralugu assartorneqarsinnaajunnaassallutik. Inerteqqut umiarsuit, umiarsuit isumannaallisaaffigineqarnerannut imaluunniit ujaasinernut annaassiniarnernulluunniit peqataappata, aamma umiarsuit Issittumi uuliamik kuuttoornermut atatillugu upalungaarsimanermik suliaqarlutik peqataasunut atatillugu atuutissanngilaq.

MARPOL ilanngussaq I-imi, maleruagassami 12A-mi pineqartunut umiarsuarnut, HFO-mik inerteqqut aatsaat ullormi 1. juli 2029-mi atuutilissaaq. Maleruagassaq umiarsuarnut katillugu uuliamik ikummatissamik 600m³-inik sinnerluguluunniit imartussusilinnut, aamma ulloq 1. august 2010-mi tunniunneqarsimasunut atuuppoq, (“tunniunneqarsimasut” ima paasineqassaaq: umiarsuit a) sanaartornissamat isumaqatigiissut isumaqatigiissutigineqarsimavoq ulloq 1. august 2007-mi kingusinnerusukkulluunniit, b) sanaartornermut isumaqatigiissut pigineqanngippat, taava ulloq 1. februar 2008-mi umiarsuit kujaalerneqarsimasunut, imaluunniit assingusumik sananeqarnerani killiffeqartunut c) ulloq 1. august 2010-mi kingusinnerusukkulluunniit tunniunneqarsimasunut, imaluunniit d) annertuumik sanaqqiineqarfigineqarsimasunut, i. tamannalu pillugu ulloq 1. august 2007-mi kingusinnerusukkulluunniit isumaqatigiissuteqartoqarsimasunut, ii. isumaqatigiissuteqartoqarsimannngippallu suliarinera ulloq 1. februar 2008-mi kingusinnerusukkulluunniit aallartinneqarsimasunut, imaluunniit iii. ulloq 1. august 2010 naammassineqarsimasunut).

Tamanna aamma umiarsuarnut maleruagassami 1.2.1. kapitali 1, Part II-A-mi pineqartunut, nunat tamalaanut umiarsuarnut Issittup imartaani umiartortunut (tamatuma kingorna taaneqartassaaq “Issittumi imartani angallannermut avatangiisinut isumannaallisaanermullu maleruagassat”) atuutissaaq. Maleruagassami 1.2.1.-mut ilaapput umiarsuit immikkoortunut A-nut aamma immikkoortunut B-nut taaneqartartut (immikkoortunut A-aamma B-umiarsuarnut ilaapput umiarsuit, umiarsuup Issittumi umiartornissamat akuersissutaa naapertorlugu immikkoortunut A-tut imaluunniit B-tut umiarsuartut Søfartsstyrelsenimit akuerineqarsimasumit piginneqatifiiffinnik pitsaassusiliisartunik akuersissutigineqarsimasut), ulloq 1. januar 2017 kingorna sananeqarsimasut katillugu uuliamik ikummatissamik 600m³-init annikinnerusumik imartussusilinnut, taamaattorli 30 m³ ataannagu. Umiarsuarsuit uuliamik assartuutit marlunnik timitallit pineqarput.

Umiarsuarnut, aallaavittut uuliap oqimaatsup umiarsuarni ikummatissatut atorneqarnissaa siunertaralugu atorneqarnissaanut assartornissaanullu ulloq 1. juli 2024-mit inerteqqummut ilaasunit, inerteqqummut tassunga naalagaaffinnit issittumi sumiiffimmut killeqartumik sineriaqartunit umiarsuarnik naalagaaffiup erfalasanik erfalasoqarlutik umiartortunit saneqqunneqarsinnaavoq, taakkua naalagaaffiup inatsisaata atortuutitaaffiata iluani umiartorpata. Kalaallit Nunaata eqqaani imartani aningaasaqarnikkut immikkut oqartussaaffigisami umiarsuit kalaallit qallunaalluunniit erfalasuannik erfalasoqarlutik umiartortut, uuliamut oqimaatsumut inerteqqummut ilaatinneqassanngillat ulloq 1. juli 2029-p tungaanut, Issittumi Kalaallit Nunaata imartaata iluani umiartorpata. Tamatumunnga immikkut akuersissutinik atulersitsinermi maleruagassat suliarineqassapput, taakku Naalagaaffiit Peqatigiit imarsiornermut suleqatigiiffianit suliarineqarnissaat naatsorsuutigineqarpoq. Aammattaaq naalagaaffiit ilaasortaasut Naalagaaffiit Peqatigiit imarsiornermut suleqatigiiffiannut immikkut akuerineqarneq pillugu paasissutissat pillugit ilisimatitsissapput. Maleruagassat HFO-mik inerteqqutip piviusunnagortinneqarerani nalunaarutikkut aalajangersaaffigineqarnissaat naatsorsuutigineqarpoq.

HFO umiarsuarni usisaatini usitut, ikummatissatuunngitsoq, suli assartorneqarsinnaavoq, uuliap issittumi illoqarfinnut, illunik kiassarnermi uuliamik taamaattumik ikummatissatut atuisartunut assartuisarnissaq suli pisariaqartinneqassammat.

2.3. Miljøministerieqarfiup isumaliutersuutai aamma aaqqiissutissatut siunnersuut

Miljøministerieqarfiup nalilerpaa HFO-mik inerteqqutip atuutsinneqalernissaanut inatsit atuuttoq malillugu naammattumik inatsisikkut tunngavissaqanngitsoq. HFO-mik inerteqqut taamaalliluni silaannarmik mingutsitsinermik pitsaaluinissamik taamaallaat siunertaqanngilaq, soorlu § 22 Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu pitsaaliuinissamik aalajangersaanissamut inatsimmik tunngavissaqartitsisoq, kisianni aamma siullertut immap uuliamik kuuttoffigineqarnissaanut pitsaaliuisussaavoq.

Taamaattumik immami ingerlatanit kapitali 2-9-mit imaluunniit §§ 21 imaluunniit 22-mi Kalaallit Nunaata eqqaani imartani aningaasaqarnikkut immikkut oqartussaaffigisani mingutsitsinermik pitsaaliuinissamut killiliinissamullu, imaani avatangiisit illersorneqarnissaat pillugu inatsimmut ilaangitsunik maleruagassanik, matumani MARPOL-imik isumaqatigiissut malillugu HFO-mik inerteqqummik

piviusunnngortitsinissaq aamma siunissami nunat tamalaat akornanni pisussaataaffiiniq piviusunnngortitsisarnissaq pillugit miljøministerip aalajangersaasinnaanermik piginnaatinnegarnissaa pisariaqartinneqartoq Miljøministerieqarfiup nalilerpaa.

Miljøministeriep nalilerpaa immami ingerlatanit mingutsitsinermik pitsaaliuineq killilersimaarinninnerlu miljøministerimit aalajangersaaasoqareernikkut nalunaarutikkut aalajangersaaffigineqartarnissaat naleqqunnerpaajusoq, aamma ilaatigut maleruagassat ajornakusoortumik teknikkikkut katitigaanerat pillugu, aamma tamanna siunissami maleruagassat pisariaqartitsineq malillugu annerpaamik allannngortinneqarsinnaanerannik pilersitsisinnaammat, aamma immami ingerlatanit allanit mingutsitsinerup pitsaaliorneqarsinnaanerata killillersimaneqarsinnaaneratalu piviusunnngortinneqarnissaanut piginnaatitsissut atorneqarsinnaammat, matumani nunat tamalaat akornanni nutaamik isumaqatigiissusiorneranni atatillugu atorneqarsinnaalluni.

Taamaattumik inatsimmut siunnersuummi siunnersuutigineqarpoq, Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsimmi aalajangersagaq kapitali 10-mut ilanngunneqassasoq, tamatumalu kinguneratut miljøministeri kapitali 2-9-ni imaluunniit §§ 21-mi imaluunniit 22-mi immami ingerlatanit avatangiisinik mingutsitsinerup pitsaaliorneqarnissaa killersorneqarnissaalu pillugu inatsimmut maleruagassanut ilaanngitsunik maleruagassanik aalajangersaanissaminut piginnaatinnegassaaq, matumani nunat tamalaat akornanni isumaqatigiissutit piviusunnngortinneqartarnissaat pillugu tak. inatsissatut siunnersuummi § 1, nr. 1, § 22 a-p ilanngunneqarnissaa pillugu.

Danskit imaani avatangiisit pillugit inatsisaanni assingusumik § 33, imm. 1-imi katersuisinnaanermut aalajangersagaqarpoq, tamatumalu kingornatigut miljøministeri immami ingerlatanit avatangiisinik mingutsitsinerup pitsaaliorneqarnissaa killersorneqarnissaalu pillugu maleruagassanik inatsimmi kapitalinit 2-10-mi maleruagassanut ilaanngitsunik, matumani nunat tamalaat akornanni isumaqatigiissutinik piviusunnngortitsinissat pillugit, aalajangersaasinnaavoq.

MARPOL-imik isumaqatigiissummi artikel 2(4)-ni allaaserineqarsimasunik umiarsuanut HFO-mik inerteqqummik naammassinninnissaq siunertaralugu maleruagassanik aalajangersaanikkut piginnaatitsineq piviusunnngortinneqarumaartoq naatsorsuutigineqarpoq, aamma Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat inatsimmi § 4, imm. 5 malillugu. Issittumi Kalaallit Nunaata eqqaani imartani aningaasaqarnikkut immikkut

oqartussaaffigisani HFO-mik umiarsuit ikummatissaattut atorneqarnissaa siunertaralugu atorneqarnissaanut assartornissaanullu inerteqqut pillugu maleruagassanik aalajangersaasoqarnissaa naatsorsuutigineqarpoq.

Maleruagassat ulloq 1. juli 2024 atuutilersitsinermit nalunaarutikkut aalajangersarneqarnissaat naatsorsuutigineqarpoq, ulloq taanna HFO-mik inerteqqutip piviusunngortinnissaanut piffissaliussinermut MARPOL-imit isumaqatigiisummit killigitinneqarpoq.

Inatsimmi § 31 malillugu Miljøministerip nakkutilliisussaatitaanera Miljøstyrelsenimut § 34, imm. 1 malillugu suliassanngortinneqassasoq naatsorsuutigineqarpoq. Miljøministerip inatsit malillugu nakkutilliinera akisussaasuuneralu allaffissornikkut nakkutilliinermut tunnganeruvoq, miljøministerimmi ataani oqartussat Kalaallit Nunaanni najuutinngimmata. Nakkutilliinermi suleqatigiinnissaq pillugu Miljøstyrelsenip, oqartussa qarfiillu allat akornanni isumaqatigiittoqarsinnaavoq.

Maleruagassat unioqqutinneqarnerani inatsisip nalinginnaasumik aaqqissuunneqarsimanera naapertorlugu aamma rigsadvokatip nalunaarutaa nr. 5/1999 ulloq 17. april 2015-mi iluarsartuunneqartoq malillugu pingaarnerusumik suliffeqarfiup unioqqutitsineq akisussaaffigaa. Taamaalilluni umiarsuaatileqatigiiffik pingaarnerusumik HFO-mik inerteqqut pillugu maleruagassat malinneqarnissaanut pisussaaffilerneqassaaq.

Taamaattumik aalajangersakkat unioqqutinneqarneranni pinerlussimanermut akisussaatsineq umiarsuaatileqatigiiffimmut atuutsinneqassaaq. Taamaattorli assersuutigalugu umiarsuup naalagaa (umiarsuaatileqatigiiffiup saniatigut) pinerlussimanermut akisussaatinneqarsinnaavoq ilaatigut taanna piaaraluni iliuuseqarsimappat imaluunniit sakkortuumik mianersuaalliorsimappat.

Umiarsuarsuarnut assartuutitut marlunnik timitalinnut, MARPOL-imik isumaqatigiisummut ilanngussaq I, maleruagqussaq 12A-mut aamma Issittumi imartani angallannermut avatangiisinut isumannaallisaanermullu maleruagassaanut 1.2.1.-imi kapitali 1, Part II-A-mut ilaasunut HFO-mik inerteqqut aatsaat ulloq 1. juli 2029 aallarnerfigalugu atuutilissaaq, tamanna pillugu tak. immikkoortoq 2.2.

Maleruagassat nalunaarusiornikkut aalajangersaavigineqarnissaat naatsorsuutigineqarpoq, tamatumalu kingorna piffissami 1. juli 2024-mit ulloq 30. juni 2029 ilanngullugu Naalagaaffiit Peqatigiit Imarsiornermut Suliniaqatigiiffiup atulersitassaattut naatsorsuutigineqartut maleruagassat malillugit HFO-mik atuinermut assartuinermullu immikkut ittumik

akuersissuteqartoqarsinnaavoq, tamanna pillugu qulaani tak. immikkoortoq 2.2.

Naalagaaffiit Peqatigiit imarsiornermut suleqatigiiffiat HFO-mik inerteqqummik allannguinnermik akuersissuteqarpat, allannguutit taakku piginnaatitsissumik siunnersuutigineqartumik inatsisikkut tunngaveqarluni aalajangersarneqarsinnaapput.

Piginnaatitsissummut siunnersuut aammattaaq miljøministerimit atorneqarsinnaavoq, kingusinnerusukkat immami ingerlatanit mingutsitsinerup pitsaaliorneqarnissaanut killilersimaarneqarnissaanullu pisariaqartitsisoqalissagaluarpat, inatsimmi kapitali 2-9-ni imaluunniit §§ 21-mi imaluunniit 22-mi immami ingerlatanit avatangiisinik mingutsitsinerup pitsaaliorneqarnissaa killersorneqarnissaalu pillugu maleruagassanut ilaanngitsunik, matumani sumiiffik pillugu Danmarkimik pisussaaffiliisunik aalajangersaasoqarnissaanik kingusinnerusukkat pisariaqartitsisoqalissagaluarpat.

Tamatuma saniatigut inatsisissatut siunnersuummi § 1, nr. 1-imi oqaaseqaatit immikkut ittut innersuutigineqarput.

3. Naalagaaffiit Peqatigiit anguniagaasa piviusunngortinnerisa kingunerisinnaasai

HFO-mik inerteqqutit atuutsinneqalernerata Issittumi HFO-mik uuliamik kuuttoornissap pitsaaliorneqarnissaa kingunerissavaa. Issittup imartaani HFO-p umiarsuit ikummatissaattut atorneqarnissaa siunertaralugu atorneqarnissaanut assartornissaanullu inerteqqut imaanik mingutsinerup pitsaaliorneqarnissaanut Naalagaaffiit Peqatigiit nunarsuarmut anguniagaanut nr. 14-imut tapertaassaaq.

Uuliamut oqinnerusumut, ass. MGO ("marine gas oil") sanilliullugu uuliap oqimaatsup ikummatissatut atorerani sananeqaatit minnerit amerlanerujussuit aniatsinneqartarput, matumani black carbon (paaq), CO₂ aamma svovl. Sananeqaatinik taakkuninnga aniatsitsinermik annikillitsisineq taamaalilluni aamma avatangiisitigut silallu pissusiatigut iluanaarutitut isumaqarfigineqarpoq.

HFO atorlugu umiartornermut aamma Issittumi umiarsuit ikummatissaattut assartuinnermut inerteqqut, taamaalilluni silaannamik mingutsitsinerup pitsaaliornissaanut tapertaassaaq, aamma matumani Naalagaaffiit Peqatigiit peqqissuseq atugarissaarnerlu pillugit nunarsuarmut anguniagaannut nr. 3-mut aamma Naalagaaffiit Peqatigiit silap pissusia suliniuteqarfigalugu anguniagaannut nr. 13-imut taamaalilluni tapertaassalluni.

4. Pisortanut aningaasatigut allaffissornikkullu kingunerisinnaasai

Miljøministeriemit inatsisissatut siunnersuut taassuminngalu piviusunnngortitsineq inatsisinik digitalimik atuinissamut tunngavinnik arfineq-marlunnik, Digitalimik Sullissinermut Aqutsisoqarfimmit suliarineqarsimasunik, malinnittuusoq nalilerneqarpoq.

Inatsisissatut siunnersuut aalajangersaanissamut piginnaatitsissummik imaqarpoq, taanna siullermik Issittumi HFO-mik inerteqqutip atuutsinneqalernerani piviusunnngortinneqassaaq. Inatsisissatut siunnersuut nammineq immi Pisortanut aningaasatigut allaffissornikkullu kinguneqassanngilaq.

Taamaattorli HFO-mik inerteqqut ukiumut 8,4 mio. kr.-nik (ukiumut 2020-mut naatsorsukkat) Kalaallit Nunaanni Namminersorlutik Oqartussanut aningaasartuutitaqassaaq, matumani atuutsinneqalernissaanut nakkutilliinermullu aningaasartuutit ilanngullugit.

Naatsorsuutigineqarpoq HFO-mik inerteqqut nalinginnaasumik HFO-mik uuliamik kuuttoornissamut aarlerinaatinik annikillisaataassasoq, tamannami annertuunik aningaasartuutitaqarsinnaavoq. HFO-mik inerteqqut aamma uuliamik koortornermut aningaasartuutinik annikillisaasinnaavoq. Taamali annikillisisinerup siumut siulittuutigineqarnissaa sapernarneruvoq. Taamaattorli uuliamik kuuttoornermi aningaasartuutit annikinnerulernissaat naatsorsuutigineqarpoq, tamassumalu inerteqqutip avatangiisinut iluanaarutaanik qaffaasinnaavoq, immikkoortoq 8-mi allaaserineqarsimasunut naleqqiullugu. Taamaattorli HFO-mik uuliamik kuuttoornissamut aarlerinaat 2029-p tungaanut suli piviusaaq, ukiumi tassani inerteqqut umiarsuarnut tamanut atuutilissammat, taamaattorli inatsit sorsuutinut umiarsuarnullu allanut naalagaaffimmit pigineqartunut atorneqartunulluunniit, umiarsuarnut taamaallaat iluanaarniutaanngitsumik naalagaaffimmit atorneqarallartunut atuutissanngilaq, tak. § 3, imm. 4., taamaattorli sorsuutinut umiarsuarnullu allanut naalagaaffimmit pigineqartunut atorneqartunulluunniit, umiarsuarnut taamaallaat iluanaarniutaanngitsumik naalagaaffimmit atorneqarallartunut atuutissanngilaq, tak. inatsimmi § 3, imm. 4, umiarsuarnut umiarsuit isumannaatsuunissaannik qulakkeerinninnermut suliaqarnermut peqataasunut imaluunniit ujaasinernik aamma annaassiniarnernik suliaqartunut, aamma umiarsuarnut uuliakoortoqarsimatillugu upalungaarsimanermut suleqataasunut.

Namminersorlutik Oqartussat siusinnerusukkut HFO-mik inerteqqutip Naalagaaffiit Peqatigiit Imarsiornermut Suliniaqatigiiffianni akuersissutigineqarneranut atatillugu tusarniaavigineqarsimapput. Inerteqqut qallunaanit kalaallinillu tapersersorneqarluni akuersissutigineqarsimavoq. Kalaallit Nunaat Kalaallit Nunaata imartaani inerteqqutip atuutsinneqalernissaanik isumaginnittuussaaq, taanna aningaasaqarnikkut immikkut oqartussaaffigisami assingusumik atuutsinneqalissaaq.

Inatsimmi aalajangersarneqareersimasumik nakkutiginnittussaataitanermit pisuffaaffiup ingerlaqanneqarnissaanut atatillugu Danmarkimut allaffissornikkut aningaasartuuteqalissasoq naatsorsuutigineqarpoq.

5. Inuussutissarsiortunut il.il. aningaasatigut allaffissornikkullu kingunerisinnaasai

Miljøministeriemit nalilerneqarpoq, inuussutissarsiordermut tunngassutilinnik malittarisassaliordermut tunngaviit (agil erhvervsrettet regulering) attuumassuteqanngitsuusut, tak. Erhvervsstyrelsenip inuussutissarsiordermut tunngassutilinnik malittarisassaliordermut tunngaviit (agil erhvervsrettet regulering) pillugit ilitersuusaa juni 2018-imeersoq malillugu attuumassuteqanngimmata, tassami inatsisissatut siunnersuummi digitalimik teknologiimik aamma ingerlatseriaatsinik ineriartortitsinermik misileraanissaaq, ineriartortitsinissaaq imaluunniit atuinissaaq pineqanngimmata.

Aalajangersaanissamat piginnaatitsissut pillugu siunnersuut siullermik HFO-mik inerteqqutip atuutsinneqalernerani piviusunngortinneqassaaq. Iisimaneqaqqissaanngilaq umiarsuit qassit Kalaallit Nunaata eqqaani imartani aningaasaqarnikkut immikkut oqartussaaffigisani HFO-mik inerteqqummik sunnerneqarumaarnersut. Taamaattorli Danske Rederierinit nalilerneqarsimavoq, HFO-mik inerteqqut Kalaallit Nunaanni inuussutissarsiortunut kingunerisinnaasai ukiumut miss. 22,7 mio. kr.-umaartut (ukioq 2020-mut naatsorsukkat). Taamattorli ikummatissanut akit aningaasat annertussusaannut apeqqutaajumaarput taamaattumillu nalorninarloqarlutik.

Erseqqissaatigineqassaaq inuiaqatigiinnut kingunerisinnaasanik aamma iluanaarutaasinnaasunik 2029-p tungaanut siumut naatsorsorsuisoqarsinnaasimannngimmat, 2029-mi inerteqqut umiarsuarnut tamanut atuutilissaaq, taamaattorli inatsit sorsuutitut umiarsuarnullu allanut naalagaaffimmit pigineqartunut atorneqartunulluunniit, umiarsuarnut taamaallaat iluanaarniutaanngitsumik naalagaaffimmit atorneqarallartunut

atuutissanngilaq, tak. inatsimmi § 3, imm. 4, umiarsuarnut umiarsuit isumannaatsuunissaannik qulakkeerinninnermut suliaqarnermut peqataasunut imaluunniit ujaasinernik aamma annaassiniarnernik suliaqartunut, aamma umiarsuarnut uuliakoortoqarsimatillugu upalungaarsimanermut suleqataasunut.

Erhvervsstyrelsenip Område for Bedre Regulering (pitsaanerusumik aalajangersaanermut suliaqarfiata) nalilersimavaa inatsisissatut siunnersuut inuussuutissarsiortunut allaffissornikkut kinguneqarumaartoq. Kingunerisinnaasat taakku 4 mio. kr.-nit ataateqqassagai nalilerneqarpoq, taamaattumillu naatsorsoqqinneqassanngillat. Matumani pineqartoq tassaavoq inuussuutissarsiortut immikkut ittumik akuersissummik qinnuteqarniarunik paasissutissanik tunniussisussaaitaanissaat.

Inatsisissatut siunnersuut immini inuussuutissarsiortunut kinguneqassanngilaq, inatsisissatut siunnersuummut aalajangersaanissamut piginnaatitsissut kisimi ilanngunneqassammat.

6. Innuttaasunut allaffissornikkut kingunerisinnaasai

Inatsisissatut siunnersuut, matumani inatsisissatut siunnersuutip piviusunngortinneqarnissaa eqqarsaatigineqartoq, innuttaasunut allaffissornikkut kingunerisassaqaanngitsoq nalilerneqarpoq.

7. Silap pissusianut kingunerisinnaasai

Inatsisissatut siunnersuut immini silap pissusianut kinguneqartitsissanngilaq, tassani aalajangersaanissamut piginnaatitsissutip ilanngunneqarnissaa kisimi pineqarmat. HFO-mik inerteqqummik nalunaarutikkut piviusunngortinneqartussamik atuutitsilerneq naatsorsuutigineqarpoq silap pissusianut iluanaaruteqartitsissasoq ukiumut 0,33 mio. kr.-nik (ukiumut 2020-mut naatsorsukkat) annikinnerusumik silaannarmik mingutsitsinerup kinguneratut naatsorsorlugu, tassami uulia oqimaatsaq CO₂-mik aniatitsinerusarmat uulianut oqitsunut naleqqiullugu. CO₂-mik aniatitsisarnissaq katillugu 2.112 tonsiussasoq naatsorsorneqarsimavoq. Annikinnerusumik black carbonimik (paaq) aniatitsineq silap pissusianut sunniutaasusaaq naatsorsorneqarsimannngilaq.

Erseqqissaatigineqassaaq silap pissusianut iluaqutaasussatut naatsorsuutigineqartut inerteqqutip 2020-mi atuutsinneqalernissaanik tunngaveqartinneqarsimammata. Inuiaqatigiinnut kingunerisinnaasanik aamma iluanaarutaasinnaasunillu 2029-mut siumut naatsorsorsuisoqarsinnaasimannngilaq, tassani inerteqqut umiarsuarnut

tamanut atuutilissaaq, taamaattorli inatsit sorsuutitut umiarsuarnullu allanut naalagaaffimmit pigineqartunut atorneqartunulluunniit, umiarsuarnut taamaallaat iluanaarniutaanngitsumik naalagaaffimmit atorneqarallartunut atuutissanngilaq, tak. inatsimmi § 3, imm. 4, umiarsuarnut, umiarsuit isumannaatsuunissaannik qulakkeerinninnermut suliaqarnermut peqataasunut imaluunniit ujaasinernik aamma annaassiniarnernik suliaqartunut, aamma umiarsuarnut uuliakoortoqarsimatillugu upalungaarsimanermut suleqataasunut. 2029-p tungaanut black carbonimik qaffasinnerusunik aniatitsisoqartarnissaa naatsorsuutigineqarpoq. Umiarsuilli ilaasa silaannarmik mingutsitsinermut annikillisaatit scrubberit ikkussuussimavaat, taamaalillutillu 2029-p tungaanut silap pissusianik pitsaanngitsumik sunniinerit annikillississimallugit.

8. Avatangiisinut pinngortitamullu kingunerisinnaasai

Inatsisissatut siunnersuut immini avatangiisinut pinngortitamullu kinguneqartitsissanngilaq, tassani aalajangersaanissamut piginnaatitsissutip ilanngunneqarnissaa kisimi pineqarmat. Inatsisissatut siunnersuummi aalajangersaanissamut piginnaatitsissutip piviusunngortinneqarnerata nassatarisaatut HFO-mik inerteqqut qallunaat inatsiseqartitsineranni piviusunngortinneqassaaq. HFO-mik inerteqqut avatangiisinut peqqissutsimullu tunngasutigut ukiumut 62,1 mio. kr.-nik iluanaaruteqarfiussaaq (ukiumut 2020-mut naatsorsukkat). Tamatumunnga sananeqaatinik minnernik aniatitsinerup annikinnerulernissaa pissutaassaaq, matumani black carbon (paaq) aamma svovl. Svovlinik katillugu annikillisitsineq naatsorsuutigineqarpoq 593 tonsiussasoq, sananeqaatinik minnernik annikillisitsineq naatsorsuutigineqarpoq 66 tonsiussasoq aamma black carbonimik (paaq) annikillisitsineq naatsorsuutigineqarpoq 6,7-14,1 tonsiussasoq.

Aammattaaq HFO Issittumi imaani avatangiisinut aamma sineriammut qanittumi pinngortitami ataqatigiinnermut aarlerinaateqarpoq, tassami uulia oqimaatsoq oqimaatsoq kinertuuvoq aamma ikummatissanit oqinnerusunit arrinnerusumik arrortinneqartarluni.

HFO pingaarnerusumik Issittumi arriitsumik arrortinneqartarpoq aamma uulia oqimaatsoq taamatuttaaq sikup ataaniilersinnaavoq annertuumillu isorartussusilinnut siaruaattarluni, taamaattumillu issittumi imaani avatangiisit aamma Issittumi sinerissamut qanittumi pinngortitami ataqatigiinnerit immikkut ittumik mianernartuupput.

HFO-mik inerteqqut taamaalilluni HFO-mik taama uuliamik kuuttoornermik pitsaaliuissaaq. Taamaattorli iluanaarut ukiumut 62,1 mio. kr.-nik avatangiisinut peqqissutsimullu iluanaarutitut ilaassanngilaq, tamanna nalorninartoqarmat. Taamaattorli HFO-mik uuliamik kuuttoornermi aningaasartuutit annertoorujussuusinnaapput.

Erseqqissaatigineqassaaq avatangiisinut peqqissutsimullu iluanaarutit naatsorsuutigineqartut inerteqqutip 2020-mi atuutsinneqalernissaannik tunngaveqarsimammata. Inuiaqatigiinnut kingunerisassai pillugit 2029-mut naatsorsuisoqarsinnaasimangilaq, tassani inerteqqut umiarsuarnut tamanut atuutilissaaq, sorsuutit umiarsuillu allat naalagaaffimmit pigineqartut atorineqartulluunniit pinnagit, tak. inatsimmi § 3, imm. 4, umiarsuarnut umiarsuit isumannaatsuunissaannik qulakkeerinninnermut suliaqarnermut peqataasunut imaluunniit ujaasinernik aamma annaassiniarnernik suliaqartunut, aamma umiarsuarnut uuliakoortoqarsimatillugu upalungaarsimanermit suleqataasunut. 2029-p tungaanut black carbonimik suli aniatitsisoqartarnissaa naatsorsuutigineqarpoq. Umiarsuilli ilaasa silaannarmik mingutsitsinermut annikillisaatit scrubberit ikkussuussimavaat, taamaalillutillu 2029-p tungaanut silap pissusianik pitsaanngitsumik sunniinerit annikillisissimallugit.

9. EU-mi inatsisinut pissutsit

Inatsisissatut siunnersuut EU-mi inatsisaasunut tunngasunik imaqanngilaq.

10. Oqartussat suleqatigiiffillu il.il. tusarniaaffigineqartut

Inatsisissatut siunnersuummut missingiut piffissami ulloq 30. marts 2023-mit ulloq 11. maj 2023 tikillugu oqartussanut suleqatigiiffinnullu il.il. tusarniaassutigalugu nassiussuunneqarpoq:

Kalaallit Nunaanni Namminersorlutik Oqartussat Kalaallit Nunaanni Naalagaaffiup Sinnisua aqutigalugu, Kalaallit Nunaata Sinnisoqarfia, Kalaallit Nunaanni Politimesteri, Advokatfirmaet Malling & Hansen Damm, Advokatrådet/Advokatsamfundet, AECO, Arctic DTU, Issittumi Sakkutooqarfik, Arktisk Stations sekretariat - Københavns universitet, Danish Seafood Association, Danmarks Naturfredningsforening, Danmarks Sportsfiskerforbund, Dansk Akvakultur, Dansk Amatørfiskerforening, Dansk Fritidsfiskerforbund, Dansk Industri, Dansk Ornitologisk Forening, Dansk Selskab for Miljøret, Dansk Assartuineq og Logistik, Danske Havne, Danske Maritime, Danske Rederier, DCE - Nationalt Center for Miljø og Energi, Det Grønlandske Selskab, Det Nationale Netværk for Klimatilpasning (DNNK), Det Økologiske Råd, ENERGINET.DK, Ferskvandsfiskeriforeningen, Foreningen af Danske Biologer, Greenland Ecosystem Monitoring (GEM), Greenland Oil Industry Association (Goia), Greenland oil spill response (GOSR A/S), Greenpeace Nordic, Kalaallit Nunaanni Sulisitsisut, Pinngortitaleriffik, Grønlandske Advokater v. Peter Schriver, ICC-Greenland, ILISIMATUSARFIK (Peqqissutsimut Pinngortitamullu Instituti), KNAPK, Kommunernes Internationale

Miljøorganisation (KIMO), Landsforeningen Levende Hav, Miljøteknisk Brancheforening - Mærsk Olie & Gas A/S, Natur og Ungdom, NOAH, Nusuka: Organizing Greenland Businesses, OCEANA, Polar Seafood, Professor, dr. jur. Ellen Margrethe Basse, Professor, dr. jur., Peter Pagh, Kalaallit Nunaanni Eqqartuussiviit, Royal Arctic Line, Royal Greenland, Søfartens Ledere, Transparency Greenland, Visit Greenland, WWF Denmark aamma AAU arctic sekretariat aamma Professor Lone Kørnøv.

Inatsisissatut siunnersuut tamatuma kingorna Namminersorlutik Oqartussanut oqaaseqarfigisussanngorlugu saqqummiunneqarsimavoq [Inatsisartut ukiakkut 2023-mi ataatsimiinneranut atatillugu] Namminersorlutik Oqartussanut inatsimmi § 17, imm. 2 malillugu.

11. Immersugassaq eqikkaaffiusoq

Aallaqqaasiullugu erseqqissaavigineqassaaq aningaasaqarnikkut aamma avatangiisinut peqqissutsimullu kingunerisassatut naatsorsuutigineqarsimasut inerteqqutip 2020-mi atuutilersinneqarnissaanik tunngaveqarsimammata. Inuiaqatigiinnut kingunerisassai pillugit 2029-mut naatsorsuisoqarsinnaasimanngilaq, tassani inerteqqut umiarsuarnut tamanut atuutilissaaq, sorsuutit umiarsuillu allat naalagaaffimmit pigineqartut atorpeqartulluunniit pinnagit, tak. inatsimmi § 3, imm. 4, umiarsuarnut, umiarsuit isumannaatsuunissaannik qulakkeerinninnermut suliaqarnermut peqataasunut imaluunniit ujaasinernik aamma annaassiniarnernik suliaqartunut, aamma umiarsuarnut uuliakoortoqarsimatillugu upalungaarsimanermut suleqataasunut.

| | Kinguneri ajunngitsut/ aningaasartuutikinnerulerneq (Aap, taava annertussutsit allakkit/ Naamik allaguk »Soqanngilaq«) | Kinguneri pitsaanngitsut/ aningaasartuuteqarnerulerneq (Aap, taava annertussutsit allakkit/ Naamik allaguk »Soqanngilaq«) |
|--|--|---|
| Naalagaaffimmut, kommuninut nunallu immikkoortuinut aningaasaqarnikkut kinguneri | Naatsorsuutigineqarpoq HFO- uuliamik inerteqqut uuliamik oqimaatsumik kuuttoornissamut aarlerinaammik aningaasartuutinillu annikillisas- saasoq. Taama annikillisitsineq siumut eqqoriaruminaanneruvoq. Taamaattorli naatsorsuutigine- qarpoq uuliamik kuuttoornermut aningaasartuutit annikilliumaartut, inerteqqutillu | Tak. ataani |

| | | |
|--|---|--|
| | iluanaarutai taamaalillutik suli annertunerulissallutik. | |
| Naalagaaffimmut, nunap immikkoortuinut kommuninullu atortuulersitsinerup kinguneri | Soqanngilaq | Inatsisissatut siunnersuut aalaja- ngersaanissamut piginnaa- titsissummik imaqarpoq, taanna HFO-mik inerteqqummik qallunaat inatsiseqartitsineranni siullermik piviusunngortitsissaaq. Taamaattorli HFO-mik inerteqqut Namminersorlutik Oqartussanut ukiumut 8,4 mio.-nik (ukiumut 2020-mut naatsorsukkat) anigaasartuuteqassaaq, matumani atuutsinneqalernissaanut aamma nakkutilliinermut. Namminersorlutik Oqartussat siusinnerusukkat HFO-mik inerteqqutip Naalagaaffiit Peqatigiit Imarsiornermut Suliniaqatigiiffianni akuersissutigineqarneranut atatillugu tusarniaavigineqarsimapput. Kalaallit Nunaat Kalaallit Nunaata imartaani inerteqqutip atuutsinneqalernissaanik isumaginnittuussaaq, taanna anigaasaqarnikkut immikkut oqartussaaffigisami assingusumik atuutsinneqalissaaq. Nakkutiginnittussaataaerner pisuffaaffiup ingerlaqanneqarnissaanut atatillugu Danmarkimut allaffissornikkut anigaasartuuteqalissasoq naatsorsuutigineqarpoq. |
| Inuussutissarsiortunut anigaasaqarnikkut kinguneri | Soqanngilaq | Aalajangersaasinnaanermut piginnaatitsissummik siunnersuut siullermik HFO-mik inerteqqutip atuutsinneqalernerani piviusunngortinneqassaaq. |

| | | |
|--|-------------|--|
| | | <p>Ilisimaneqaqqissaanngilaq umiarsuit qassit Kalaallit Nunaata eqqaani imartani aningaasaqarnikkut immikkut oqartussaaffigisani HFO-mik inerteqqummik sunnerneqarumaarnersut. Taamaattorli Danske Rederierinit nalilerneqarsimavoq, HFO-mik inerteqqut Kalaallit Nunaanni inuussutissarsiortunut kingunerisinnaasai ukiumut miss. 22,7 mio. kr.-umaartut (ukioq 2020-mut naatsorsukkat). Taamattorli ikummatissanut akit aningaasat annertussusaannut apeqputaajumaarput taamaattumillu nalorninarloqarlutik.</p> |
| Inuussutissarsiortunut allaffissornikkut kinguneri | Soqanngilaq | <p>Erhvervsstyrelsenip Område for Bedre Regulering (pitsaanerumik aalajangersaanermut suliaqarfiata) nalilersimavaa inatsisissatut siunnersuut inuussuutissarsiortunut allaffissornikkut kingunekarumaartoq. Kingunerisinnaasat taakku 4 mio. kr.-nit ataateqqassagai nalilerneqarpoq, taamaattumillu naatsorsoqqinneqassanngillat. Matumani pineqartoq tassaavoq inuussuutissarsiortut immikkut ittumik akuersissummik qinnuteqarniarunik paasissutissanik tunniussisussaataitaassasut.</p> |
| Innuttaasunut allaffissornikkut kinguneri | Soqanngilaq | Soqanngilaq |

| | | |
|---|---|--------------------|
| <p>Silap pissusianut kingunerisinnaasai</p> | <p>Inatsisissatut siunnersuut immami ingerlatanit mingutsitsinerup pitsaaliornissaanut killilernissaanullu maleruagassanik atuutsitsisoqalernissaanik periarfissiivoq. Inatsimmut siunnersuummi aalajangersaanissamut piginnaatitsissutsip pavisunngortinnerata nassatarissavaa HFO-mik inerteqqutip qallunaat inatsiseqartitsineranni piviusunngortinneqarnera. HFO-mik inerteqqut silap pissusianut ukiumut 0,33 mio. kr.-nik iluanaaruteqartitsissaaq.</p> | <p>Soqanngilaq</p> |
| <p>Avatangiisinut pinngortitamullu kingunerisinnaasai</p> | <p>Inatsisissatut siunnersuut immamit ingerlatanit mingutsitsinermik pitsaaliunissamut killilersuinissamullu maleruagassanik pavisunngortitsinissamut periarfissiissaaq. Inatsimmut siunnersuummi aalajangersaanissamut piginnaatitsissutip pavisunngortinnerata nassatarissavaa HFO-mik inerteqqutip qallunaat inatsiseqartitsineranni piviusunngortinneqarnera. HFO-mik inerteqqut avatangiisinut iluanaaruteqartitsissasoq ukiumut 62,1 mio. kr.-nik iluanaaruteqartitsissasoq</p> | <p>Soqanngilaq</p> |
| <p>EU-mi inatsisinut pissutsit</p> | <p>Inatsisissatut siunnersuut EU-mi inatsisaasunut tunngasunik imaqqanngilaq.</p> | <p></p> |
| <p>EU-mi inuussutissarsiornermut tunngassutilinnik</p> | <p>Aap</p> <p>Attuumassuteqanngilaq</p> | <p>Naamik</p> |

| | |
|--|--|
| malittarisassaliornermut tunngavinnut tallimanut akerliuvoq/EU-mi aalajangersaanermi minnerpaaffissamut piumasaqaatinit annerusunik piumasaqarpoq. (X- ileruk) | |
|--|--|

*Inatsisissatut siunnersuummi aalajangersakkanut ataasiakkaanut
oqaaseqaatit*

§- 1-imut

Nr. 1-imut

Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsimmi nr. 1534, 19. december 2017-imeersumi § 22 malillugu miljøministeri immikkut ittumik iliuitsit pillugit maleruagassanik aalajangersaasinnaavoq, matumani silaannarmik mingutsitsinerup killilernissaa siunertaralugu umiarsuarni ikummatissanut piunasaqaatit pillugit. Inatsisit atuuttut malillugit umiarsuarni ikummatissanut piunasaqaatinik maleruagassanik aalajangersaanissamut maleruagassaqaranilu inatsisikkut tunngavissaqaanngilaq, matumani taassuma atorneqarnissaanut assartornissaanullu inerteqqut ilanngullugu, imarmik mingutsitsinerup killilernissaa siunertaralugu.

22 *a-mi* aalajangersagassatut siunnersuutigineqartup kinguneratut miljøministerip immami ingerlatanit mingutsitsinerup pitsaaliornissaanut killilernissaanullu maleruagassanik, kapitali 2-9 imaluunniit §§ 21 imaluunniit 22-mi maleruagassanut ilaanngitsunik, aalajangersaassaaq, matumani nunat tamalaat akornanni isumaqatigiissutinik naammassinninnissaq siunertaralugu. Aalajangersagaq siunnersuutigineqartoq danskit imaani avatangiisit pillugit inatsisaanni § 33, imm. 1-imi aalajangersakkamut atuuttumut imamigut assinguvoq. Pitsaaliuinertut killilersimaarinninniutitullu ass. allagaatinik uppernarsaateqarnissaq, nakkutilliinissaq aamma inerteqqut pillugit maleruagassanik aalajangersaasoqarsinnaavoq.

Naatsorsuutigineqarpoq aalajangersaanissamut piginnaatitsissut uuliap oqimaatsup ("heavy fuel oil", kingorna taaneqartassaaq HFO") Issittup imartaani ikummatissatut atorneqarnissaanut angallannissaanullu inerteqqummik nalunaarummi maleruagassanik aalajangersaanikkut pivisunngortinneqarumaartoq. Inerteqqutip Issittumi HFO-mik uuliamik kuuttoornermut pitsaaliuinissaq pillugu malittarisassaq 43A-p MARPOL-imik isumaqatigiissummi ilanngussaq I-imiittoq pivisunngortissavaa.

Inerteqqut umiarsuarnut MARPOL artikel 2(4)-mi allaaserineqartunut atuutissaaq aamma ulloq 1. juli 2024-mi atortuulersinneqarnissaa naatsorsuutigineqarluni, ulloq taanna MARPOL-imik isumaqatigiissutip inerteqqutip atuutilernissaanut piffissaliussaraa.

Inerteqqutip kinguneratut uuliat MARPOL-imik isumaqatigiisummi ilanngussaq I regel 43.1.2-imi allatorneqarsimasut malillugit (uulia, uulia akuiaagaangitsoq pinnagu, 900 kg/m³ ved 15° C-ngarnit qaffasinnerusumik kinissuseqarlutik oqimaassusillit imaluunniit 180 mm 2 /s ved 50° C-nit qaffsinnerusumik kinematisk viskositetillit) ulloq 1. juli 2024-mit ikummatissaattut atorneqarnissaat siunertaralugu atorneqarnissaanut assartornissaanullu atorneqarsinnaajunnaassapput. Inerteqqut umiarsuarnut umiarsuit isumannaatsuunissaannik qulakkeerinninnermut suliaqarnermut peqataasunut imaluunniit ujaasinernik aamma annaassiniarnernik suliaqartunut, aamma umiarsuarnut uuliakoortoqarsimatillugu upalungaarsimanermit suleqataasunut atuutissanngilaq.

Umiarsuarnut, MARPOL-imik isumaqatigiisummi ilanngussaq I-imi, maleruagqusamut 12A-mut ilaasunut imaluunniit Issittumi imartani angallannermit avatangiisinut isumannaallisaanermullu maleruagassat maleruagassartaanut 1.2.1-imut ilaasunut inerteqqut aatsaat ulloq 1. juli 2029 aallarnerfigalugu atuutilissaaq.

Maleruagassaq 12A-mut ilaapput umiarsuit katillugu uuliamik ikummatissamik 600m³-inik sinnerluguluunniit imartussusillit, aamma ulloq 1. august 2010-ip kingorna tunniunneqarsimasunut atuulluni. (“tunniunneqarsimasut” ima paasineqassaaq: umiarsuit a) sanaartornissamut isumaqatigiisut isumaqatigiisutigineqarsimavoq ulloq 1. august 2007 kingusinnerusukkulluunniit, b) sanaartornermut isumaqatigiisut pigineqangippat, taava umiarsuit kujaalernerqarsimasunut, imaluunniit assingusumik sananeqarnerani killiffeqartunut ulloq 1. februar 2008-mi, c) ulloq 1. august 2010-mi kingusinnerusukkulluunniit tunniunneqarsimasunut, imaluunniit d) annertuumik sanaqqiineqarfigneqarsimasunut, i. tamannalu pillugu ulloq 1. august 2007-mi kingusinnerusukkulluunniit isumaqatigiisuteqartoqarsimasunut, ii. isumaqatigiisuteqartoqarsimangippallu suliarinera ulloq 1. februar 2008-mi kingusinnerusukkulluunniit aallartinneqarsimasunut, imaluunniit iii. ulloq 1. august 2010 naammassineqarsimasunut).

Tamanna aamma umiarsuarnut maleruagassami 1.2.1. kapitali 1, Part II-A-mi pineqartunut, nunat tamalaat umiarsuarnut Issittup imartaani taamaallaat angalasunut (tamatum kingorna taaneqartassaaq “Issittumi imartani angallannermit avatangiisinut isumannaallisaanermullu maleruagassat”) inerteqqut aatsaat ulloq 1. juli 2029 aallarnerfigalugu atuutilissaaq.

Maleruagassami 1.2.1.-mut ilaapput umiarsuit immikkoortunut A-nut aamma immikkoortunut B-nut taaneqartartunut, (immikkoortunut A-aamma B-umiarsuarnut ilaapput umiarsuit, umiarsuup Issittumi umiartornissamut akuersissutaa malillugu immikkoortunut A-tut imaluunniit B-tut umiarsuartut Søfartsstyrelsenimit akuerineqarsimasumit piginneqatigiiffinnik pitsaassusiliisartunit akuersissutigineqarsimasut), ulloq 1. januar 2017 kingorna sananeqarsimasut katillugu uuliamik

ikummatissamik 600m³-inik minnerusumik imartussusilinnut, taamaattorli 30 m³ ataannagu. Umiarsuarsuit uuliamik assartuutit marlunnik timitallit pineqarput.

Umiarsuarnut, Danmarkip Kalaallillu Nunaata akornanni umiartortunut, MARPOL-imik isumaqatigiisummut ilanngussaq I-imi, maleruagqusamut 12A-mut ilaasunut imaluunniit Issittumi imartani angallannermut avatangiisinut isumannaallisaanermullu maleruagassat maleruagassartaanut 1.2.1-imut ilaasunut inerteqqut aatsaat ulloq 1. juli 2029 aallarnerfigalugu atuutilissaaq.

Naatsorsuutigineqarportaaq qallunaat kalaallilluunniit erfalasuannik erfalasoqarlutik umiartortunut HFO-mik utaqqiisaagallartumik atuinissamut assartuinissamullu inerteqqutip malinnginnissaanut immikkut ittumik akuerineqarsinnaajumaartut piffissami 1. juli 2024-mit ulloq 30. juni 2029 ilanngullugu. Naalagaaffiit Peqatigiit Imarsiornermut Suliniaqatigiiffiup atulersitassaatur naatsorsuutigineqartut maleruagassat malillugit HFO-mik atuinnermut assartuinnermullu immikkut ittumik akuersissuteqartoqarsinnaavoq. Miljøministerieqarfik Naalagaaffiit Peqatigiit Imarsiornermut Suliniaqatigiiffianut immikkut ittumik akuersissutinik paasissutissiisassaaq.

Immikkut ittumik akuersissuteqarsinnaaneq Miljøstyrelsenimut § 34, imm. 1 naapertorlugu suliaassanngortinneqassasoq naatsorsuutigineqarpoq.

Naalagaaffiit Peqatigiit imarsiornermut suleqatigiiffiata MARPOL-imik isumaqatigiisutaanni ilanngussaq I-imi HFO-mik inerteqqut pillugu allannguutit akuersissutigippagit, allannguutit taakku piginnaatitsissummi siunnersuutigineqartumi inatsisitigut tunngaveqarluni aalajangersaavigineqarsinnaapput. Piginnaatitsissut taamaalilluni MARPOL-imi isumaqatigiisummi maleruagassanik allanik, inatsisip ataani piginnatitsissutit allat ataaniingitsunik, aalajangersaanissamut atorneqarsinnaavoq.

Piginnaatitsissutissatut siunnersuutigineqartoq aammattaaq miljøministerimit atorneqarsinnaavoq, kingusinnerusukkut immami ingerlatanit mingutsitsinerup pitsaaliorneqarnissaanut killilersimaarneqarnissaanullu, inatsimmi kapitali 2-9-ni imaluunniit §§ 21-mi imaluunniit 22-mi immami ingerlatanit avatangiisinik mingutsitsinerup pitsaaliorneqarnissaa killersorneqarnissaalu pillugu maleruagassanut ilaangitsunik maleruagassanik aalajangersaasoqarnissaanik pisariaqartitsisoqalissappat, matumani siunissami nunat tamalaat akornanni isumaqatigiisutit piviusunngortinnissaanut atorneqarsinnaalluni soorlu nunat tamalaat akornanni imaani avatangiisinik mingutsitsineq pillugu

isumaqatigiissutini maleruagassanik aalajangersaanermi aamma Naalagaaffiit Peqatigiit Imarsiornermut Suliniaqatigiiffiata iluani.

Taamaalilluni aalajangersagaq malillugu assersuutigalugu Kalaallit Nunaata eqqaani imartani aningaasaqarnikkut immikkut oqartussaaffigisami immikkut ittumik ingerlatanut imaani avatangiisinik sunnuteqartunut maleruagassanik aalajangersaasoqarsinnaavoq, matumani imartap immikkut qanoq ittuussusaa pissutigalugu imaluunniit ingerlatat mingutsitsinissamut aarlerinaatillit piareersimaffiginiarlugit. Assersuutitut taaneqarsinnaavoq (“tankeqarfiit imaani puttasut”) aamma umiarsuarnik kangerlunni angalajunnaartitsigallarneq il.il. pillugit aalajangersaasoqarsinnaaneraniq periarfissanik pisariaqartitsisoqalersinnaavoq. § 22 a-mi aalajangersagaq siunnersuutigineqartoq aamma inatsimmi aalajangersakkani allani aalajangersaaffigineqarsimangitsunut imaarsinermut imaluunniit igitsinermut aalajangersaanissamut atorneqarsinnaavoq

§ 22 a-p ilanngunneqarnissanut siunnersuutip kinguneratut miljøministeri imaluunniit forsvarsministeri § 22 a malillugu aalajangersakkat malinneqarnissaannik nakkutilliisinnaalissapput, tak. inatsimmi § 31, imm. 1. Nakkutilliinermik oqartussaaffik aamma politiit nakkutilliinermut atatillugu politiit pisariaqartitamik kinaassutsimut uppersaateqarlutik, eqqartuussivitsigut aalajangiinertaqanngitsumik umiarsuarnut ikisinnaapput, tak. § 31, imm. 2. Aammattaaq nakkutilliinermik oqartussaaffik misissuisinnaavoq, misiligutinik tiguisinnaavoq, assiliivimmik assiliisinnaalluni, uppersaateqarlutik allakkianik kopeerisinnaalluni tiguisinnaalluniluunniit kiisalu akiliuteqarani pigisanik allanik tiguisinnaalluni, tak. § 31, imm. 3.

Inatsimmi § 31 malillugu Miljøministerip nakkutilliisussaataitanaera Miljøstyrelsenimut § 34, imm. 1 malillugu suliassanngortinneqassasoq naatsorsuutigineqarpoq. Miljøministerip inatsit malillugu nakkutilliinera akisussaasuuneralu allaffissornikkut nakkutilliinermut tunnganeruvoq, miljøministerimmi ataani oqartussat Kalaallit Nunaanni najuutinngimmata. Nakkutilliinermi suleqatigiinneq pillugu Miljøstyrelsenip, oqartussaqaarfiillu allat akornanni isumaqatigiittoqarsinnaavoq. Aalajangersakkap siunnersuutigineqartup atuutsinneqalerneranut atatillugu nakkutilliinermik aaqqiineq naleqqunnerpaaq pillugu aalajangiisoqarnissaa siunertaralugu oqartussat attuumassuteqartut akornanni oqallisiginittoqarumaartoq naatsorsuutigineqarpoq.

HFO-mik inertequtit atuutsinneqalernerani inatsimmi § 34, imm. 2 malillugu naammagittaalliorsinnaatitaaneq pillugu aalajangersaasoqarnissaa aammattaaq naatsorsuutigineqarpoq. Matumani aalajangiinerit miljøministerimut

naammagittaalliuutigineqarsinnaannginnerat
aalajangersaasoqarumaartoq naatsorsuutigineqarpoq.

pillugu

§ 22 a-mik ilanngussinissamik siunnersuut inatsimmi § 46 allannguutissatut siunnersuutigineqartumut ataqatigiissillugu isigineqassaaq, tak. inatsisissatut siunnersuummi § 1, nr. 2, tamatumalu kingorna § 22 a-mi taaneqartunik maleruagassanik unioqutitsineq akiliisitsilluni pineqaatissiisoqarsinnaavoq, aammattaaq piaaraluneerluni imaluunniit sakkortuumik mianersuaalliorluni unioqutitsineruppat, unioqutitsinikkullu avatangiisit ajoquserneqarsimappata, imaluunniit taamatut pisoqarnissaa aarlerinaateqalersimappat, imaluunniit nammineq allalluunniit aningaasatigut iluanaarutigineqarsimappata imaluunniit tamanna siunertarineqarsimalluni, sipaarutit ilanngullugit, Kalaallit Nunaanni pinerluttulerinermut inatsit malillugu pineqaatissiisutininik allanik eqqartuussisoqarsinnaavoq. Naatsorsuutigineqarpoq HFO-mik inerteqqut pillugu maleruagassanik unioqutitsisimaneq pillugu maleruagassanik aalajangersaasoqarumaartoq. Aalajangersakkanik unioqutitsinermut pinerluutigisimasamut akisussaatinneqarneq umiarsuaatileqatigiiffimmut atortuutinneqassaaq. Taamaattorli umiarsuup naalagaa piaaraluni imaluunniit sakkortuumik mianersuaalliorluni unioqutitsimappat, umiarsuup naalagaanut (umiarsuaatileqatigiiffiup saniatigut) pinerluutigisamik suli akisussaatisoqarsinnaavoq

Nr. 2-mut

Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsimmi atuuttumi § 46, imm. 1 malillugu, maleruagassat § 6, imm. 2, § 7, imm. 2, §§ 9 og 11-14, § 16, imm. 2-4, § 18, imm. 2, § 19, § 20, imm. 4, § 21, imm. 4, aamma §§ 22, 24, 25 aamma 41 malillugit, maleruagassanik unioqutitsineq pillugu akiliisitsilluni pillaatissiisoqarsinnaavoq. § 46, imm. 3 malillugu, maleruagassanik imm. 1-imi taaneqartunik unioqutitsineq Kalaallit Nunaanni pinerluttulerinermi inatsit malillugu pineqaatissiisutininik allanik eqqartuussissuteqartoqarsinnaavoq, unioqutitsineq piaaraluni imaluunniit sakkortuumik mianersuaalliorluni unioqutitsinerusimappat, aamma unioqutitsinikkullu avatangiisit ajoquserneqarsimappata, imaluunniit taamatut pisoqarnissaa aarlerinaateqalersimappat, imaluunniit nammineq allalluunniit aningaasatigut iluanaarutigineqarsimappata, matumani tamanna siunertarineqarsimalluni, sipaarutit ilanngullugit. § 46, imm. 3 nunanit allanit umiarsuarnit unioqutitsinernut atuutinngilaq, tak. § 46, imm. 4.

Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsimmi § 46, imm. 1-imut allannguutissatut siunnersuut malillugu

siunnersuutigineqartumut § 22 a-mut innersuussineq ilanngunneqassaaq, tak. inatsisissatut siunnersuummi § 1, nr. 1.

§ 46 , imm. 1-imut allannguutissamut siunnersuutip nassatarisaatut § 22 a-mi taaneqartunik maleruagassanik unioqquitsineq akiliisitsilluni kinguneqartitsisoqarsinnaavoq. § 46, imm. 1-p siunnersuutigineqartup aammattaaq sunniutigissavaa, qallunaat kalaallillunniit umiarsuaannit § 22 a-mik unioqquitsineq Kalaallit Nunaanni pinerluttulerinermi inatsit malillugu pineqaatissiissutinik allanik eqqartuussisoqarsinnaavoq, unioqquitsineq piaaraluni imaluunniit sakkortuumik mianersuaalliorluni unioqquitsinerusimappat, aamma unioqquitsinikkullu avatangiisit ajoquserneqarsimappata, imaluunniit taamatut pisoqarnissaa aarlerinaateqalersimappat, imaluunniit nammineq allalluunniit aningaasatigut iluanaarutigineqarsimappata, tak. inatsimmi § 46, imm. 3 aamma 4.

Maleruagassat unioqquatinneqarnerani inatsisip nalinginnaasumik aaqjissuunneqarsimanera malillugu aamma naalagaaffiup advokatiata nalunaarutaa nr. 5/1999 ulloq 17. april 2015-mi iluarsartuunneqartoq malillugu pingaarnerusumik suliffeqarfiup akisussaaffigaa. Taamaalilluni umiarsuaatileqatigiiffiup pingaarnerusumik HFO-mik inerteqqut pillugu maleruagassat malinneqarnissaannut pisussaaffilerneqassapput.

Aalajangersakkat unioqquatinneqarneranni pinerluuteqarsimasutut akisussaaffik taamaattumik umiarsuaatileqatigiffimmut atuutsinneqassaaq, assersuutigalugu umiarsuup naalagaanut (umiarsuaatileqatigiiffiup saniatigut) ilaatigut taanna piaaraluni iliuuseqarsimappat imaluunniit sakkortuumik mianersuaalliorsimappat.

§- 2-imut

Inatsit ulloq 1. juli 2024-mi atuutilersinneqassasoq siunnersuutigineqarpoq.

Inatsit Kalaallit Nunaannut toqqaannartumik atuuppoq.

Ilanngussaq 1

Inatsisisatut siunnersuut inatsisinut atuuttunut naleqqiullugu

| <i>Oqaasertaliinerit atuuttut</i> | <i>Inatsisissatut siunnersuut</i> |
|--|--|
| | <p>§ 1</p> <p>Kalaallit Nunaata eqqaani imartani aningaasaqarnikkut immikkut oqartussaaffigisaq pillugu inatsimmi nr. 1534, 19. december 2017-imeersumi tulliuttut uku allannguutigineqassapput:</p> |
| | <p>1. § 22-p kingorna <i>kapiteli 10 ilanngunneqassaaq:</i></p> <p style="padding-left: 40px;">»§ 22 a. Miljøministeri immami ingerlatanit mingutsitsinerup pitsaaliornissaanut killilernissaannullu maleruagassanik, kapitali 2-9 imaluunniit §§ 21 imaluunniit 22-mi maleruagassanut ilaanngitsunik, aalajangersaassaaq, matumani nunat tamalaat akornanni isumaqatigiissutit eqqortinniarlugit.«</p> |
| <p>§ 46. Maleruagassani § 6, imm. 2, § 7, imm. 2, §§ 9 og 11-14, § 16, imm. 2-4, § 18, imm. 2, § 19, § 20, imm. 4, § 21, imm. 4, aamma §§ 22, 24, 25 aamma 41 malillugit, aalajangersarneqarsimasunik maleruagassanik unioqqutitsineq pillugu akiliisitsilluni pillaatissiisoqarsinnaavoq.</p> <p><i>Imm. 2-3. ---</i></p> | <p>2. § 46, imm. 1-imi »§§ 22,« kingorna ilanngunneqassaaq: »22 a,«.</p> |